



16. marts 2017

UPA 2017/60

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

2018-miit ukiuni marluugallartuni misiliilluni unnukkut ammasartussamik (nal. 16-24) nuna tamakkerlugu call-centerimik, Nuna tamakkerlugu Ilitsersuisarfik (NTI-p) ataani pilersitsinissamat Naalakkersuisut peqquneqarnissaannik Inatsisartut aalajangiiffigisassaattut siunnersuut. Call-Centeri sukkasuumik kinaassutsimillu isertuussilluni ilinniartunut, ilinniarnikkut, aningaasatigut inuttulluunniit ajornartorsiuteqartunut ikorfartuissaaq siunnersuisarlunilu. Call-centerip aamma taamatut siunnersuisarsinnaassaaq ilinniartut ilaqutaannut.

(Inatsisartunut ilaasortaq Nivi Olsen, Demokraatit)

Tunngavilersuut:

Center for National Vejledning (NTI) isumassarsiatsialaavoq aamma pingaaruteqarpoq ikerinnakkut ilinniarunnaartartut ikilisinniarlugit suliniuteqarnitsinni. Taamaakkaluatorli aamma qangatut siunnersuisarnek pillugu eqqarsarneruvoq, siunnersuutaamat naapilluni ataatsimeeqatigiittarnissaq oqaloqatigiittarnissarlu, inunnut ataasiakkaanu iliuusissanut pilersaarusiortarnissaq ilaalu ilanngullugit.

Tassanilu tamatigut pisariaqarpoq ilinniartut ikorfartorneqarnissaminnut/siunnersorneqarnissaminnut pisariaqartitsisut nammineq takuttarnissaat, aamma kisinnatik aamma nukissaqarlutik takkussinnaanissaat suliniutillu suliaralugit. Isertuussilluni ilinniartunut siunnersuisarfimmit siunnersorneqarnissamat periarfissatuaavoq nalunaaqutaq 8 aamma 16-p akornanni nammineq sianerluni saaffiginnittarnissaq imaluunniit mailerluni takinerpaamik A4 ataaseq allallugu. Tamatuma kingorna akissutisisoqartassaaq ullut 14-t ingerlanerini. Annertunerusumik siunnersorneqarusukkaanni, nammineerluni saaffiginnittariaqarpoq¹.

Demokraatini isumaqarpugut qangatut eqqarsarnertigut ikiorneqarnissaminnut pisariaqartitsivissortut ikiunngitsooriataarsinnaagigut. Amerlasuunut ilisariteqqaarani sianertarnissaq toqqissisimanarpoq imaluunniit siunnersortimik chatteqateqarnissaq tamannalu aqqutigalugu siunnersortilluni ilitsersortillunilu. Amerlasuutigut iluaqutaasarpoq ajornartorsiutigisamat ilinniarnermilu akimmisaarfigisanut allat tusarnaarsinnaanerat. Tassani pingaaruteqarpoq inuiaqatigiit neqeroorsinnaanissaat ilisariteqqaanngikkaluarluni

¹ <http://www.vejledning.gl/socpsy-raadg/anonym-henvendelse.aspx?lang=da>

ikiuisoqartarnissaanut kiisalu erngiinnaq ikiuisoqartarnissaanut. Ilinniartunut taakkulu qanigisaanut taamatut siunnersuinissamut ullumikkut periarfissaqanngilaq.

Qanigisat ikorfartorneqarsinnaanissaat/siunnersorneqarsinnaanissaat siunnersuummi qitiusupilussuuvoq. Pissutaavoq ilinniartut ajornartorsiuteqartut namminneq ikiortissarsiornissaminnut nukissaalatsisarnerat. Tassani qanigisat ikiuussinnaapput siunnersortissarsiornermi nuna tamakkerlugu call-centeri aqqutigalugu.

Nuummi, Qaqortumi Sisimiuni, Aasianni Ilulissanillu NTI-p ataani naligninnaasumik ilinniartunut siunnersuisarfiit ulluni naligninnarni ammasarput nal. 8-16 aamma allaaserineqareersutut kinaassutsimut isertuussinissamut periarfissat killilerujussuupput. Tamatuma saniatigut periarfissaqanngilaq qanigisat saaffiginnissinnaanissaat. Taamaattumik call-centerip isumagaa, ammasarnissaq nal. 16-miit 24-mut, tassani ilinniartut (imaluunniit taassuma qanigisai) piffissaqarnerussammata nukissaqarnerullutillu siunnersortimut attaveqarnissaminnut.

Imminut ilisariteqqaarani oqarasuaatikkut/chat-ikkut siunnersuisarnerup aamma iluaqutigissavaa, artornannginnerusutut isikkoqarmat. Aamma ataasiakkaat akimmisaarfimminnik qaangiiniarnerminni tassuunakkut ikiorneqarsinnaassapput. Tamaaliornikkut siunnersuut aamma ilinniartunut ikerinnakkut taamaattartunut ikilisaaqataaalluarsinnaavoq.

Soorunami aamma suliasaqartarumaarpoq imaaliallaannaq siunnersortimit suliarineqarsinnaanngitsunik. Tamannarpiarlu pissutaavoq call-centerip NTI-mi inissisimanissaanut, oqarasuaatikkummi siunnersuisarfimmi pingaartuusup taamaalilluni sulisunik immikkut ilisimasalinnik allanik oqaloqateqariarluni sianertumut uteqqissinnaavoq sapinngisamillu sukkanerpaamik eqqortumik ikorfartuilluni/siunnersuilluni.

Takorloorpara siunnersortit inunnut isumaginninnermut peqqinnissamulluunniit tunngasumik ilinniarsimasuussasut, soorlu peqqissaasutut, perorsaasutut, inunnik isumaginninnermut siunnersortitnut assigisaanilluunniit, qularnaarumallugu siunnersortit ilinniakkatigut tunuliaqutaqarluarnissaa sapinngisamik saaffiginnittut amerlanerpaat ikiorsinnaajumallugit. Tamatuma saniatigut siunnersortit ingerlaavartumik siunnersortit tunngaviusumik ilinniarsinnaavoq siunnersortit pikkorinnerulerumalluni (soorunami siunnersortip atorfininnginnermini ilinniagaq taanna aqqusaareersimangippagu).

Pingaaruteqarpoq sianernerit/chatternerit tamarmik nalunaarsorneqartarnissaat ukiullu aappaa avillugu ingerlareeraangat nalilersuisoqartarnissaa misiliummik aqqissuussinerup qanoq atornerqartiginera pillugu. Tamatumani siunertaralugu aqqissuussinerup atornerqalivinnissaa ulloq 1. januar 2020 aallarnerfigalugu.

Takorloorpara call-centerip Center for National Vejledningimi ineqartinneqarnissaa, tassa sumiiffissaa iluarsereerumallugu. Naliliinera naapertorlugu misiliinerup nalaani ingerlatsinnermut aningaasartuutit 2018-mi 2019-milu 3 millioner koruuniussapput. (Atuaruk titarnertaaq "Aningaasatigut allaffissornikkullu pisortanut kingunerussat" tamanna pillugu paasissutissat

amerlanerusut piumallugit).

Aningaasat taakku 2018-mut Aningaasanut Inatsisissatut siunnersuummi kiisalu 2019-mi missingersuutitut missingersersuusiami pingaartinneqassapput, Kulturimut, Ilinniartitaanermut, Iisimatusarnermut Ilageeqarnermullu Naalakkersuisoqarfup missingersuutitut sinaakkutissaasa tunniunneqartussat iluanni.

Partiit allat ilanngussassaasa tusarnissaannut qilanaarpugut aamma Naalakkersuisut akissuteqarnissaannut.

Aningaasatigut allaffissornikkullu pisortanut kingunerusussat

Siunnersuutip 2018-mi 2019-milu katillugit 3 millioner koruuninik aningaasartuutitaqarnissaa tagginneqarpoq. Kisitsimmi tunngaviupput Aningaasanut Inatsimmi konto 40.90.13-mi allassimasut. Tassanitakuneqarsinnaavoq 7,6 millioner koruunit atorneqartartut sulisut 18-t akissarsiaqartinneqarnerannut.

Agguaqatigiisillugu inuk ataaseq ukiumut akissarsiaqartinneqartarpoq 400.000 koruuninik. Nalilerpara sulisut immikkut pingasunik amerlineqartariaqassasut call-centerip ullut tamaasa nalunaaqutaq 16-miit 24-mut ammasarnerani sulisut naammattut pigineqassappata. Tamatuma qaavatigut naliginnaasumik allaffissornermut aningaasartuuteqassaaq kiisalu siunnersortitut tamanna pisariaqartinneqassappat (soorlu tarnip pissusaanut immikkut ilisimasalimmik siunnersorneqarnissaaq pisariaqassappat assigisaanilluunniit).

Misileereernerup kingorna suut pisariaqartinneqassanersut takujuminarsiumaarpoq taamatullu aamma siunissami suut aningaasartuutaasarumaarnersut call-centerimi.

Aamma naatsorsuutigaarput siunnersuutip ikerinnakkut ilinniarunnaartartut ikilisikkumaarai, taamaattumik piffissaq ungasinnerusoq isigalugu inuiaqatigiit aningaasatigut iluaquserneqassapput.

Aningaasatigut allaffissornikkullu sullivinnut namminersortunut kingunissai.

Soqanngilaq.

Aningaasatigut allaffissornikkullu innuttaasunut kingunissai

Ilinniartut taakkulu qanigisaat ilinniarnikkut, aningaasaqarnikkut imaluunniit inuttut ajornartorsiutillit ullumimut naleqqiullugu kinaassusertik isertuullugu siunnersorneqarnissaminut periarfissaat pitsaanerujussuannngussapput. Tamatumap kinguneranik ilinniartut ataasiakkaat akimmisaarfimmik aqqinnissaannut eqqortumik ikorfartorneqarnissaat siunnersorneqarnissaallu ilimanarnerulissaaq taamaasillunilu ataasiakkaat aamma ilinniarnerminnut naammassinnissinnaanissaat ilimanarnerulissaaq.